

Date – 25/06/2025

Time - 18:30 -18:40Hrs

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Kum 1975 June ni 25-a ram puma emergency puan hriat rengna ni, Samvidhaan Hatya Diwas chu vawiin khan ram pumah urhsun taka hman a ni.
2. Aizawlah chuan Art & Culture Department buatsaihin Chief Minister Pu Lalduhoma hovin Samvidhaan Hatya Diwas puala hun hman a ni.
3. Information & Communication Technology department Minister Dr Vanlalhlana chuan lehkha hmanga file system kalpui mek thlakna tur E-Office kalpui tan a ni a ti.
4. US President Donald Trump-an Iran leh Israel-in inkah hai neih an remtih thu a puan hnu lawkah Yemen-a Houthi pawl chuan Israel an bei chhonzawm zel dawn tih an sawi.



**CM : SAMVIDHAAN HATYA DIWAS**

Kum 1975 June ni 25-a ram puma emergency puan hriat rengna ni, Samvidhaan Hatya Diwas chu vawiin khan ram pumah urhsun taka hman a ni a, emergency puan vanga harsatna nasa tak tuartute hnena zahna hlanna ni-ah hman a ni bawk.

Prime Minister Narendra Modi-a chuan khawng taka Emergency do dal tlattute, he ni pual hian zahna chibai a hlan a, vawiin hi India democracy chanchina hun thim lai ber a thlen atanga kum 50-na anih thu social media-ah tarlangin he ni-ah hian India ram Danpui chu hnawl a ni, a ti a, fundamental right-te khuahkhirh a nih bakah chanchinbu mite zalenna pawh hmeh mih a ni, a ti a, political party hruaitu hrang hrang bakah khawtlang taka thawktute, zirlaite leh khua leh tui engemawzat jail-ah tan tir an ni, a ti bawk.

**(BYTE)**

Aizawlah chuan Art & Culture Department buatsaihin Vaivakawna Cultural Centre cum Auditorium ah Samvidhaan Hatya Diwas puala hun hman a ni a, he hunah hian Chief Minister Pu Lalduhoma'n India ram danpui,

Constitution chu kum 1975-ah thah anih thu leh hemi hriatreng nan leh a thlen tawh lohna turin Samvidhaan Hatya Diwas chu hman a nih thu a sawi.

Chief Minister chuan Samvidhan Hatya Diwas chu Politics-a inbeihna hmanruate pawh a ang thei naa, Democracy tun din leh ram Danpui humhalh a tulzia hriat thar na a ni tih hriat a ngai a ti a, India danpui hnuaiah Mizo hnam leh sakhuate humhimna fel tak a awm tih sawiin Article 371G ah Mizote tan inhumhimna fel taka dah a nih thu leh Bengal Eastern Frontier Regulation Act 1873 hmangin Inner Line Regulation leh non tribal ten Mizoramah ram an neih ve theih lohna a awm thu a sawi.

Chief Minister chuan Danpuiin Mizote a humhim tlat avang leh democracy lungphum – zalenna – Mizoten an neih avangin India ramah Mizote an him a ti a. Mizote himna leh him lohna chu danpuiah a inngah thu sawiin dan chu palzut a nih chuan engkim a derthawng nghal mai dawn a ti.

*Byte of Chief Minister....*

Art & Culture Minister Pu C. Lalsawivunga pawhin thu sawiin India danpui venhim kawngah hma lak a ngaih thu a sawi a, India danpui chu dan thuziak satliah a nih loh thu leh India rama dan lal ber, mipuite kaihruaitu a nih thu a sawi a. India danpui ngaipawimawha a thil tum te tihlawhtling turin kalkhawm te a sawm a ni.

*Byte of Minister C. Lalsawivunga*

Samvidhan Hatya Diwas puala hun hmanah hian zirilaite an kal khawm a. He ni puala thil pawimawh hrang hrang phochhuah a ni bawk a ni.

Samvidhan Hatya Diwas pual hian Aizawla BJP pisa ah hun hman a ni a, heta thusawitu BJP Mizoram State President Pu Vanlalhmuaka'n kum 1975 a Congress sorkar, Pi Indira Gandhi in emergency a puan chu thangthar lo awm zel tur ten an theihngihl ngai tawh dawn lo a ti a. Khatiang thil kha khawvel democracy ram lian leh ropui berah a thlen tawh lohna turin inzirtira inhrilhchhawn zel a ngai a ni a ti a.

Pu Vanlalhmuaka chuan Emergency puan a nih lai khan khatih laia Prime Minister Pi Indira Gandhi khan amah chu Constitution-a a inngaih tawh thu leh thuneihna vawrtawp amah a inpek thu a sawi a. Article 352 leh 356 tlawhchhanin politics-a amah tan lo tu chu nasa takin a bei a ti a, Mizoramah pawh Maintenance of Internal Security Act hmangin Brig. T, Sailo, Pu R. Vanlawma, Pu C. Vulluaia, Pi Sanglianchhungi te bakah mi tam tak man an nih thu sawiin tute emaw sawisel ngawr ngawr an ni lo a ti a, khatiang thil duhawm lo thleng kha a thlen tawh lohna turin thangthar zel te zirtir a pawimawh avangin he ni puala hun hman anih thu a sawi.

<><><>

MPCC

Mizoram Pradesh Congress Committee (MPCC) Treasurer Dr Lalmalsawma Nghaka chuan Mizoram Universal Health Care Scheme (MUHCS) chu zawm tura private hospital te nawrh luihin an awm ni a lang mek chu thil nihphung tur a ni lo a ti.

Vawiina Aizawl Press Club-a chanchinbumite a kawmnaah he thu hi sawiin MPCC Treasurer chuan MUHCS chungchanga Private Hospital neitute thuchhuah leh TV vela an kawmna atanga sawrkar in a duh ang barhluih tuma hma a la ni awma lang chu an ngaih thutak thu a sawi a. Private hospital te nen sawihoa inrem tur a nih laia sorkarin a duh anga engkim a kalpui hnuah zawm tura a ti chu Private hospital te tan pawm theih chi niin a langlo a ti.

MPCC Treasurer chuan MUHCS-a tun thlenga mi 5000 vel chauh an la inziaklut chuan mipui rinhlelhna a la len zia a ti lang a ti a, Sorkar damdawiin lian ZMC leh Civil Hospital-ah khum chan a har avangin emergency tak taka inzai ngai te, nau vei ten Private Hospital an pan loh theih loh hun a awm avangin harsatna a thleng chho mek a ni a ti a, heng thil lo thlen chhan chu sawrkar ruahmanna fel loh vang leh kalphung hriat loh vang a ni a ti.

Hei hi kalphung thar anih chuan mipui in an tuar nasa dawn a, an hriselna pheii chuan a tuar hle dawn a ni a ti a. Scheme mumal lo taka kalpui a tum chu ZPM sawrkar chuan ngaihtuah tha leh se, Private Hospital te nen inremna neihpui thuai se, hlawhtling takin kal se tih chu an party duhdan a ni a ti.

<><><>

#### VEGETABLE VENDOR PRESS CONF

Aizawl Tennis Court chhehvela thlai thar zual thin te chuan AMC in an sawnna AMC Multi Complex Building chhawng sang hmun chep taka thutin an tan awmzia a neih loh avangin kum tam tak an lo thut tawhna hmun ngaia thut tir leh turin thuneitute an ngen tih an sawi.

Vawiina Tennis Court Chawhmeh zuar Welfare ten Aizawl Press Club-a an President Pi Lalruatkimi hoa chanchinbumite an kawmnaah an President chuan Tennis court chhehvelah chuan kum 2000 hmalam atangin Inrinniah chauh an thut thin thu a sawi a. AMC Multicomplex chu Treasury bazara kar tuana thu thin te sawn luhna tura ruahman a nih avangin tun dinhmunah mi 80 vel thut theihna turah mi 200 dawn an hnawh luh thu leh a then chu ke a kalna step-ah te thuttir an nih thu sawiin nidanga an lei chhuah thin zatve pawh an lei theih tawh loh thu a sawi a. Thuneitute chu an dinhmun hrethiam tura an ngen tih a sawi a ni.

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

#### ICT PRESS CONF

Information & Communication Technology department Minister Dr Vanlalhlana chuan lehkhah hmanga file system kalpui mek thlakna tur E-Office kalpui tan a nih thu a sawi.

Vawiina a pisaa chanchinbumite a kawmnaah he thu hi sawiin Minister chuan e office kalpui bakah hian sorkar department website te tha zawka siam hna thawh mek a ni a ti a. Mizorama eOffice kalpuina atan hian Department of Personnel and Administrative Reforms (DP&AR) chu nodal department a nih thu leh implementing department chu Department of Information & Communication Technology a nih thu a sawi a. Tuna eOffice atana software hman chu NIC siam a nih thu leh deployment leh hosting chu RailTel lam tih a nih thu a sawi a ni.

Minister chuan eOffice chu kumin April ni 18 khan ‘Go-Live’ niin hman tan a lo ni tawh tih a sawi a. A tirah Secretariat-a Department thlan bik pali, DP&AR(GGT), ICT, School Education leh PWD-ten an hman hnuah tunah chuan, Secretariat-a Department zawng zawng, department 41 bakah Chief Minister Office (CMO)-ah te hman a nih tawh thu a sawi.

<><><>

HOUTHIS TO CONTINUE MILITARY OPS

US President Donald Trump-an Iran leh Israel-in inkah hai neih an remtih thu a puan hnu lawkah Yemen-a Houthi pawl chuan Israel an bei chhunzawm zel dawn tih an puang a, Houthi political bureau member, Mohd al-Bukhaiti-a’n social media-ah he thu hi tarlangin America, Zionist leh Iran-ten inkahhai puan chu an tawng thiam chhun sipai chakna a ni tih nemnghehtu a ni, a ti.

Israel-in Gaza a beihna a tih tawp hma chuan an pawl chuan Israel chu sipai chakna hmangin an bei zel dawn tih a tarlang bawk.

<><><>